

Službene novine Federacije BiH, broj 82/14

Na osnovu člana 35. stav 4. Zakona o zdravstvenom osiguranju ("Službene novine Federacije BiH", br. 30/97, 7/02, 70/08 i 48/11), federalni ministar zdravstva donosi

NAREDBU

O STANDARDIMA I NORMATIVIMA ZDRAVSTVENE ZAŠTITE IZ OBAVEZNOG ZDRAVSTVENOG OSIGURANJA U FEDERACIJI BOSNE I HERCEGOVINE

OSNOVNE ODREDBE

I.

(1) Ovom naredbom utvrđuju se standardi i normativi zdravstvene zaštite iz obaveznog zdravstvenog osiguranja (u daljem tekstu: Standardi i normativi), i čine sastavni dio ove naredbe (Prilog 1.).(2) Standardi i normativi iz stava (1) ovog člana, čine zdravstveni standard u Federaciji Bosne i Hercegovine (u daljem tekstu: Federacija BiH), koji se pod jednakim uvjetima osigurava svim osiguranim osobama.

II.

(1) Novčana vrijednost zdravstvenog standarda iz člana 1. stav (2) ove naredbe, određuje se na osnovu Standarda i normativa utvrđenih ovom naredbom, izraženo u bodovima.(2) Vrijednost boda iz stava (1) ovog člana utvrđuje se na osnovu Plana prihoda i rashoda sredstava za obavezno zdravstveno osiguranje.

STANDARDI I NORMATIVI ZDRAVSTVENE ZAŠTITE

III.

Standard zdravstvene zaštite, u smislu ove naredbe, čini obim i strukturu zdravstvenih usluga koje se pod jednakim uvjetima osiguravaju osiguranim osobama u zadovoljavanju potreba u primarnoj, specijalističko-konsultativnoj i bolničkoj zdravstvenoj zaštiti.

IV.

Standard primarne zdravstvene zaštite utvrđuje se brojem osiguranih osoba po jednom radnom timu.

V.

Za sekundarni i tercijarni nivo zdravstvene zaštite, normativi broja osiguranika su prikazani tako da obuhvataju sve dobne grupe osiguranih osoba bez obzira što pojedini timovi (prema djelatnostima) pružaju usluge samo određenoj dobnoj ili spolnoj grupi. Pojedine discipline koje pružaju usluge posebnim dobnim ili spolnim grupama, to će raditi, ali je zbog pojednostavljivanja obračunavanja potrebnog broja timova ili drugih kapaciteta normativ prikazan za kompletnu populaciju.

VI.

Standard hitne medicinske pomoći, higijensko-epidemiološke djelatnosti i javnog zdravstva utvrđuje se brojem stanovnika po jednom radnom timu, po specijalnosti, s tim da se dio sredstava finansira iz obaveznog zdravstvenog osiguranja, a dio iz budžeta.

VII.

Standard specijalističko-konsultativne zdravstvene zaštite utvrđuje se brojem osiguranih osoba po jednom radnom timu, po specijalnosti.

VIII.

Standard bolničke zdravstvene zaštite utvrđuje se brojem slučajeva hospitalizacije na 1000 osiguranih osoba, prosječnim brojem dana liječenja, brojem bolno-opskrbnih dana na 1000 osiguranih osoba posebno za svaku specijalnost (vrstu bolničkog odjeljenja).

IX.

Kroz sva tri nivoa zdravstvene zaštite, standard laboratorijsko-dijagnostičke djelatnosti utvrđuje se brojem osiguranih osoba, odnosno brojem standardnih bolničkih postelja na jedan radni tim.

X.

Normativ zdravstvene zaštite u provođenju obaveznog zdravstvenog osiguranja, u smislu ove naredbe, čini: a) normativ medicinskog kadra, b) normativ vremena.

XI.

(1) Normativ vremena predstavlja utvrđenu količinu ulaganja rada, koju je neophodno osigurati da bi se izvršila zdravstvena usluga, odnosno realizirao program zdravstvene zaštite iz osnovnog paketa

zdravstvenih prava.(2) Normativ medicinskog kadra izražava se:a) u primarnoj i specijalističko-konsultativnoj zdravstvenoj zaštiti kroz sastav radnog tima i broj osiguranih osoba na jedan radni tim, po djelatnosti ili specijalnosti,b) u bolničkoj zdravstvenoj zaštiti kroz sastav radnog tima i broj postelja na jedan radni tim, po specijalnosti,c) u dijagnostičkim i ostalim djelatnostima kroz sastav radnog tima i broja osiguranih osoba ili broja bolesničkih postelja na jedan radni tim, po djelatnosti.

XII.

(1) Normativ vremena čini vremenski normativ u minutama za kompletan radni tim, za svaku specijalnost ili djelatnost po jednoj prosječnoj usluzi.(2) U Federaciji BiH se pruža integrirana zdravstvena zaštita svim osiguranim osobama, što podrazumijeva i osobe sa invaliditetom. Pružanje svih zdravstvenih usluga ovim osobama zahtijeva veći normativ vremena.

XIII.

(1) Normativ radnog tima predstavlja broj osiguranika čije zdravstvene potrebe iz određene djelatnosti može zadovoljiti jedan tim u okviru punog radnog vremena.(2) Broj timova potrebnih za zadovoljenje zdravstvenih potreba stanovništva podrazumijeva i pružanje očekivanog broja usluga.

XIV.

(1) Očekivane usluge tima u toku godine podrazumijevaju i određenu vrijednost ili cijenu, što se iskazuje kroz cijenu godišnjeg rada tima.(2) Cijena godišnjeg rada tima podrazumijeva sve troškove: troškove radne snage, troškove amortizacije, sve materijalne troškove, kao i troškove rada nezdravstvenih radnika.

XV.

Standardi i normativi predstavljaju jedan od elemenata za utvrđivanje programa zdravstvene zaštite iz obaveznog zdravstvenog osiguranja i osnov su ugovaranja zavoda zdravstvenog osiguranja kantona sa zdravstvenim ustanovama.

PRELAZNE I ZAVRŠNE ODREDBE

XVI.

Danom stupanja na snagu ove naredbe prestaju da važe slijedeći propisi, i to:1. Odluka o standardima i normativima zdravstvene zaštite iz obaveznog zdravstvenog osiguranja ("Službene novine Federacije BiH", broj 5/03, 18/04, 57/07 i 53/08);2. Naredba o standardima i normativima zdravstvene zaštite iz obaveznog zdravstvenog osiguranja u pogledu apotekarske djelatnosti ("Službene novine Federacije BiH", broj 36/05);3. Naredba o standardima i normativima zdravstvene zaštite iz obaveznog zdravstvenog osiguranja u djelatnosti porodične medicine, radiološke dijagnostičke djelatnosti primarnog nivoa i preventivne zdravstvene zaštite mladeži u školama i fakultetima ("Službene novine Federacije BiH", broj 6/11), i4. Naredba o standardima o normativima zdravstvene zaštite iz obaveznog zdravstvenog osiguranja u djelatnosti centra za mentalno zdravlje u zajednici, centra za fizikalnu rehabilitaciju, preventivne

zdravstvene zaštite mladih u školama i fakultetima i specifične zdravstvene zaštite sportista ("Službene novine Federacije BiH", broj 104/13).

XVII.

Ova naredba stupa na snagu osmog dana od dana objavljivanja u "Službenim novinama Federacije BiH", a primjenjivat će se od 01.01.2015. godine. Poddokument - STANDARDI I NORMATIVI PRIMARNE ZDRAVSTVENE ZAŠTITE Opšta medicina
Naredba

Fed. ministarstvo zdravstva